

Reglur um vottun virkjana fyrir útgáfu upprunaábyrgða, útgáfufەرli og upplýsingagjöf viðvíkjandi útgáfu upprunaábyrgða

1. Breytingar frá fyrri útgáfu

Þetta er önnur útgáfa reglnanna. Í samræmi við lögbundið hlutverk sitt sem útgefanda upprunaábyrgða hérlandis og að beiðni hagaðila við útgáfu upprunaábyrgða hefur Landsnet um skeið verið aðili að Association of Issuing Bodies (AIB) í því skyni að gera hagaðilum kleift að stunda viðskipti með upprunaábyrgðir á alþjóðavettvangi. Í þessari útgáfu hefur verið bætt við ákvæðum varðandi gagnaöflun og upplýsingagjöf umsækjanda upprunaábyrgða sem Landsnet hf. telur nauðsynlega vegna útgáfu þeirra til þess að tryggja heilindi við útgáfu upprunaábyrgða og eftir atvikum til samræmis við EES reglur sem gildi hafa hérlandis, gildandi staðli sem og EECS reglum AIB. Einnig hefur verið bætt við reglurnar frekari skilgreiningum ásamt því að gert er ráð fyrir því að sérhver umsækjandi þurfi að fylla út sérstaka umsókn vegna beiðni um útgáfu upprunaábyrgða.

1. Inngangur

1.1. Samkvæmt 1. mgr. 3. gr. laga nr. 30/2008 um upprunaábyrgð á raforku sem framleidd er með endurnýjanlegum orkugjöfum o.fl. annast Landsnet hf. útgáfu upprunaábyrgða á raforku sem framleidd er með endurnýjanlegum orkugjöfum eða samvinnslu raf- og varmaorku. Neðangreindar reglur eiga við um vottanir virkjana, útgáfufەرli og öflun upplýsinga hjá umsækjendum sem Landsnet hf. telur nauðsynlegar vegna útgáfu upprunaábyrgða. Reglurnar grundvallast annars vegar á 2. mgr. 3. gr. laga nr. 30/2008 um upprunaábyrgð á raforku sem framleidd er með endurnýjanlegum orkugjöfum o.fl. og hins vegar á 2. mgr. 5. gr. sömu laga. Samkvæmt fyrr tilvitnuðu greininni hefur Landsnet hf. eftirlit með því að raforka, sem það gefur út upprunaábyrgð fyrir, sé í raun framleidd með endurnýjanlegum orkugjöfum eða samvinnslu raf- og varmaorku í skilningi laga nr. 30/2008 í samræmi við viðmiðanir sem eru hlutlægar, gagnsæjar og án mismununar. Samkvæmt 2. mgr. 5. gr. sömu laga er umsækjanda skylt að veita Landsneti hf. allar upplýsingar sem Landsnet hf. telur nauðsynlegar viðvíkjandi útgáfu upprunaábyrgðar.

2. Skilgreiningar

Eftirfarandi skilgreiningar gilda um reglur þessar:

2.1. *Endurnýjanlegir orkugjafar*: Endurnýjanlegir orkugjafar sem eru ekki jarðefnaeldsneyti (vindorka, sólarorka, jarðvarmaorka, öldu- og sjávarfallaorka, vatnsorka og orka úr lífmassa, hauggasi, gasi frá skólphreinsunarstöðvum og lífgasi).

2.2. *Lífmassi*: Lífbrjótanlegur hluti afurða, úrgangs- og efnaleifa frá landbúnaði (þ.m.t. efni úr bæði jurta- og dýraríkinu), skógrækt og tengdum atvinnugreinum, auk lífbrjótanlegs hluta iðnaðarúrgangs og húsasorps.

2.3. *Raforka sem er framleidd með endurnýjanlegum orkugjöfum:* Raforka frá orkuverum sem eingöngu nota endurnýjanlega orkugjafa, auk raforku sem er framleidd með endurnýjanlegum orkugjöfum í verum með blandaðri tækni þar sem notaðir eru óendurnýjanlegir orkugjafar auk endurnýjanlegra orkugjafa.

2.4. *Umsækjandi:* Umsækjandi um útgáfu upprunaábyrgðar getur verið sá lögaðili sem á og rekur þá vinnslueiningu sem í hlut á eða þriðji aðili sem hefur samningsbundið umboð frá framleiðanda raforku um heimild til þess að óska eftir útgáfu og til að taka á móti upprunaábyrgð á raforku sem framleidd er í þeirri vinnslueiningu sem í hlut á.

2.5. *Upprunaábyrgð er í reglum þessum notað yfir upprunaábyrgðir af tvennum toga:*

2.5.1. *Upprunaábyrgð á raforku sem framleidd er með endurnýjanlegum orkugjöfum:* Staðfesting á að raforka sé framleidd með endurnýjanlegum orkugjöfum, þ.m.t. vindorku, sólarorku, jarðvarmaorku, öldu- og sjávarfallaorku, vatnsorku og orku úr lífmassa, hauggasi, gasi frá skólphreinsunarstöðvum og lífgasi, en ekki orkugjöfum úr jarðefnaeldsneyti, og/eða

2.5.2. *Upprunaábyrgð á raforku frá samvinnslu:* Staðfesting á að raforka sé framleidd með samvinnslu sem hefur góða orkunýtni samkvæmt viðmiðunum sem Orkustofnun setur.

2.6 *Vottunaraðili:* Sá aðili sem annast vottun virkjana vegna útgáfu upprunaábyrgða.

3. Vottunaraðili

3.1. Landsnet hf. annast vottun virkjana á Íslandi vegna útgáfu upprunaábyrgða. Vottun annars vottunaraðila en Landsnets hf. á virkjun vegna útgáfu upprunaábyrgða, telst fullnægjandi ef (i) vottun er yngri en 5 ára, (ii) vottunargögn uppfylla þær viðmiðanir sem taldar eru upp í 4. kafla þessara reglna og (iii) vottunaraðili teljist fullnægjandi að mati Landsnets.

4. Viðmiðanir við vottun virkjana

4.1. Við vottun virkjunar vegna útgáfu upprunaábyrgðar skal vottunaraðili ganga úr skugga um að eftirfarandi viðmið séu uppfyllt:

- a) Raforka frá virkjuninni sé eingöngu framleidd með endurnýjanlegum orkugjöfum eða samvinnslu raf- og varmaorku.
- b) Eingöngu séu gefnar út ábyrgðir fyrir þá raforku sem seld er frá virkjuninni eða samvinnslueiningunni.
- c) Mælingar á framleiðslu viðkomandi virkjunar eða samvinnslueiningar raf- og varmaorku séu áreiðanlegar.

4.2 Vottun virkjunar og samvinnsloeiningar raf- og varmaorku er gild í 5 ár frá þeim degi er vottun fer fram. Að þeim tíma liðnum skal framkvæma vottun að nýju.

5. Umsóknarferli og upplýsingar frá umsækjanda vegna umsóknar um útgáfu upprunaábyrgða

5.1. Umsækjanda ber að fylla út sérstaka umsókn í tengslum við beiðni hans um útgáfu upprunaábyrgða. Eyðublað umsóknar er að finna á heimasíðu Landsnets.

Umsækjanda ber að veita Landsneti hf. allar upplýsingar sem Landsnet hf. telur nauðsynlegar viðvíkjandi útgáfu upprunaábyrgðar. Ekki er heimilt að gefa út upprunaábyrgð ef fullnægjandi upplýsingar eru ekki fyrir hendi.

5.2. Eftir að gengið hefur verið úr skugga um að umsókn varði raforku framleidda með endurnýjanlegum orkugjöfum eða samvinnslu raf- og varmaorku er upprunaábyrgðin forskráð með rafrænum hætti hjá miðlægum umsjónaraðila skráninga upprunaábyrgða (Grexel).

Umsækjanda ber í umsókn að tilgreina eftirfarandi með yfirlýsingu sinni:

- a) að hvorki í raforkusölusamningum, né öðrum samningum eða gögnum umsækjanda, sé að finna samningsákvæði eða afleiddar skyldur sem feli í sér takmörkun á heimildum umsækjanda sem framleiðanda raforku til þess að fá útgefnar og/eða framselja þær upprunaábyrgðir sem hann tilgreinir í umsókn sinni.
- b) að umsækjanda sé ekki kunnugt um annað en að umsókn hans um upprunaábyrgð, sé í samræmi við gildandi lög, staðla og önnur kröfuskjöl sem um útgáfu upprunaábyrgða gilda.

5.3. Í þeim tilfellum þegar umsækjandi sækir um útgáfu upprunaábyrgðar á grundvelli samningsbundins umboðs skal liggja fyrir fullnægjandi staðfesting framleiðanda þeirrar raforku sem sótt er um útgáfu upprunaábyrgðar fyrir að umsækjandi hafi slíkt umboð og að umboðsmaður hafi heimild til þess að gefa yfirlýsingu fyrir hönd framleiðanda um þau atriði sem getið er í liðum a) og b) í grein 5.2. í þessum reglum. Landsnet áskilur sér rétt til þess að kanna gildi slíkra heimilda m.a. með því að hafa beint samband við framleiðanda raforku er umsækjandi kveðst leiða rétt sinn frá.

5.4. Að uppfylltum framangreindum skilyrðum skal upprunaábyrgð gefin út með rafrænum hætti hjá miðlægum umsjónaraðila skráninga upprunaábyrgða (Grexel) og gerð umsækjanda aðgengileg.